

Interess per dus departaments

Partida socialdemocratica dal Grischun

DA GION NUTEGN STGIER / ANR

■ **Peter Peyer, il candidat da la ps grischuna, duai vegnir elegi en l'emprim scrutini. Quai è la finamira dals socialdemocrats da noss chantun. El ha gronda experientscha politica ed el saja competent, è vegni ditg ier a chaschun da la lantschada da campagna.**

Ier ha la ps grischuna envidà a Cuir a ils meds da massa a la lantschada da campagna da *Peter Peyer*, ses candidat per la regenza grischuna. Il socialdemocrat da Trin duai daventar successur da cusseglier guvernativ *Martin Jäger*. El duai procurar che la ps saja er suenter las tschernas chantunalas dals 10 da zercladur vinavant represchentada en la regenza. Ils promoturs da Peyer èn persuadids ch'el po purtar vinavant il Grischun er cun esser sco socialist in aderent da l'economia, dal turissem e da la cultura.

Tut auter che be ina spassegida

La deputada e manadra da campagna *Beatrice Baselgia* ha ditg ch'il grond pensum saja ussa da persuader uschè bleras persunas sco pussaivel en tut las regiuns dal Grischun dal format politic da Peyer. Nus essan conscients che quai n'è betg be ina spassegida, ha punctuà l'antieriura presidenta communal da Domat. Per la ps na saja anc mai stà lev da gudagnar in sez en la regenza, ha menziunà Baselgia. Dals novs candidats saja Peyer segir quel cun la pli vasta experientscha politica. Tuts ch'han gia collavurà cun el attestan ad el gronda cum-



Peter Peyer duai daventar successur da Martin Jäger en la regenza grischuna.

FOTO G. N. STGIER

petenza dal fatg e sociala. Cun sia lingua clera e la moda e maniera nuncumpli-tgada haja Peyer cuntanschi blera renconuschientscha.

Diversidad da perspectives

A pled è er vegnida l'autura engiadinaisa *Romana Ganzoni*. Ella ha ditg: «Nus

duvrain el e cun el gudogna il Grischun er quai che pertutga la diversidad da perspectives e quella è necessaria per ina regenza represchentativa.» «Peter Peyer è

in socialdemocrat che funcziuna era cun l'economia», è l'impressari *Beat De Coi* persuadi, ch'è stà collià electronicamain da San Francisco a la conferenza da medias. Or d'atgna experientscha appreziescha el la collavuraziun cun il candidat da la ps.

«Progress per il Grischun»

Peter Peyer ha sez skizzà ses program sut il motto «Progress per il Grischun». Il program cuntogn tranter auter engaschament per «la pli auta qualidad da viver en in attractiv spazi da viver e da lavur grischun», dapli spiert da pionier, en spezial tar la digitalisaziun e la protecciun dal clima, e dapli schanzas per ils Grischuns e las Grischunas. Ses engaschi riguarda las persunas che fan bleras chaussas endretg en lur vita, sa participeschan, resguardan las reglas, lavuran fermamain, ma han tuttina il sentiment da betg vegnir vinavant. E las persunas che «stattan bain, ma che vulan viver en in chantun Grischun ch'è progressiv e gist», uschia Peyer. Clera è era sia annunzia tar in'eventuala elecziun: «Gugent surpigliass jau il departament d'economia u da finanzas» perquai ch'ina roschada a la repartiziun da departaments fiss buna per il chantun.

Peyer renconuscha il princip da collegialità, empermetta dentant era da defender las atgnas ideas e valurs sco cusseglier guvernativ e da represchentar questas en la regenza a moda constructiva ed efficazia.